

懷遠縣志卷之十二

賜同進士出身安徽鳳陽府懷遠縣知縣孫讓修

歷代大事記

禹五年會諸侯于塗山

竹書紀年夏后紀禹五年巡狩會諸侯于塗山

春秋左氏傳哀七年禹合諸侯於塗山執玉帛者萬國杜註塗山在壽春東北

淮南子原道訓昔者夏鯀作三仞之城諸侯背之海外有狡心禹知天下之叛也乃壞城平池散財物焚甲兵施之以德海外賓服四夷納職合諸侯於塗山執玉帛者萬國

二儀實錄禹集諸侯於塗山之夕忽大風雷震中有甲兵及卒

懷遠縣志

卷十二

記大事

一

一千餘人至禹所云海神來朝

郡國志塗山禹會諸侯之所有石船長一丈云禹所乘

陳邦衡竹書紀年集証塗山之說不一方以智定爲壽春之塗山從杜預左傳註及王伯厚說也今考紀年禹五年會諸侯於塗山八年會諸侯於會稽前後兩會不得混而爲一蓋塗山在壽春爲禹五年會諸侯之地會稽在越禹八年會諸侯之地不得謂塗山有會稽之名會稽有塗山之目也

周穆王三十九年會諸侯於塗山

竹書紀年周紀穆王三十九年王會諸侯於塗山春秋左氏傳昭四年穆有塗山之會杜註塗山在壽春東北

陳邦衡竹書紀年集証玉宿於黃竹夢羿射於塗山至是因合

諸侯而會之是時王方有事於東南故爲此會

周靈王十三年諸侯會吳於向

春秋襄公十有四年春王正月季孫宿叔老會晉士匄齊人宋人衛人鄭公孫蠆曹人莒人邾人滕人薛人杞人小邾人會吳於向杜註吳來在向諸侯會之故曰會吳向鄭地

按杜氏以向爲鄭地當指潁州長社之向

今開封府尉氏縣

考春秋時

會吳多就吳于淮上如鍾離

今鳳陽

善道

今盱眙

是也是時吳方爲

楚所敗安敢隔絕楚境遠涉鄭地今懷遠之向東距鍾離八十里北距善道百八十里當是當日會吳之地餘詳城戍考敬王五年吳伐楚楚師至于沙汭

春秋左氏傳昭二十七年吳公子掩餘公子燭庸帥師圍潛楚

### 懷遠縣志

### 卷十二

記大事

一一

莠尹然工尹麋帥師救濤沈尹戌率都君子與王馬之屬以濟師與吳師遇於窮令尹子常以舟師及沙汭而還杜註沙水名水經註曰沙水東流注於淮謂之沙汭京相璠曰楚東地也

按吳師圍潛

今霍山縣

楚恐其侵軼及淮故陸師出光固水師沿沙

入淮今旣遇之於窮

今霍邱縣

且距淮尚遠故舟師至沙汭而還也

顯王二十三年齊魏會於平阿

史記齊田完世家宣王七年與魏王會平阿南正義曰沛郡平阿縣也

又魏世家惠王三十五年與齊宣王會平阿南正義曰地理志沛郡有平阿縣也

又孟嘗君列傳宣王七年田嬰使於韓魏韓魏服於齊嬰與韓

昭侯魏惠王會齊宣王東阿南正義曰東阿齊州縣盟而去索隱曰紀年當惠文王之後元十一年作平阿

六國表周顯王二十三年齊宣王七年與魏會平阿南

按戰國時淮南北皆楚地齊魏何由會于此似當從孟嘗君傳作東阿然齊廣地至泗上此或為齊之邊境亦未可知故附存而辨之

後漢順帝建康元年九江賊徐鳳等稱帝於當塗山中

後漢書冲帝紀建康元年十二月九江盜賊徐鳳馬勉等稱無

上大將軍攻燒城邑

又滕撫傳陰陵人徐鳳馬勉等皮冠黃衣帶玉印稱皇帝營於

當塗山中註當塗縣之山也在今宣州

懷遠縣志

卷十二

記大事

三

資治通鑑建康元年九江盜賊徐鳳馬勉等攻燒城邑鳳稱無

上將軍勉稱皇帝築營於當塗山中建年號置百官 考異曰

帝紀永嘉元年三月勉稱皇帝今據滕撫傳

按章懷註以為宣州之當塗誤也

靈帝初平元年曹操自揚州募兵還過龍亢

三國志魏武紀初平元年太祖與夏侯惇等詣揚州募兵刺史

陳温丹陽太守周昕與兵四千餘人還到龍亢士卒多叛裴註魏書

曰兵謀叛夜燒太祖帳太祖手劍殺數十人餘皆披靡乃得出營其不叛者五百餘人

又曹洪傳揚州刺史陳温宿與洪善洪將家兵千餘人就温募

兵得廬江上甲二千人東到丹陽復得數千人與太祖會龍亢

獻帝建安十三年孫權遣張昭攻當塗

三國志吳主傳建安十三年權自圍合肥使張昭攻九江之當塗昭兵不利

資治通鑑建安十三年十二月孫權自將圍合肥使張昭攻九江之當塗不克

按張昭傳裴註引吳書曰權征合肥命昭別討匡琦當是匡琦時據當塗也

十四年七月曹操以水軍自渦入淮

三國志魏武紀建安十四年七月自渦入淮出肥水軍合肥

資治通鑑建安十七年七月曹操引水軍自渦入淮出肥水軍合肥

魏文帝黃初六年八月以舟師循渦入淮

懷遠縣志

卷十二

記大事

四

三國志魏文紀黃初六年八月以舟師自譙循渦入淮

資治通鑑同

齊王芳嘉平初兗州刺史令狐愚屯平阿

三國志王凌傳凌外甥令狐愚以才能爲兗州刺史屯平阿甥舅並典兵專淮南之重

資治通鑑兗州刺史令狐愚司空王凌之甥也屯于平阿

許所望曰

魏兗州治廩邱今屯平阿蓋軍事取一時之便也

晉武帝泰始六年吳入渦口

晉書五行志泰始五年四月辛酉地震明年孫皓遣大眾入渦

口

三國志吳書丁奉傳建衡元年奉復帥眾沿涂塘因攻晉穀陽

穀陽人知之引去奉無所獲皓怒斬奉導軍

資治通鑑泰始六年吳丁奉入渦口揚州刺史牽宏擊走之考異曰吳志丁奉傳建衡元年攻晉穀陽晉帝紀不載奉傳不言入渦口疑是一事

穆帝永和十一年以謝尚鎮馬頭

晉書穆帝紀永和十一年十月進豫州刺史謝尚督并冀幽三

州諸軍事鎮西將軍鎮馬頭

按尚傳云進鎮西將軍鎮壽陽

升平三年謝萬遣將修馬頭城帥眾入渦潁援洛陽晉書謝萬傳萬再遷豫州領淮南太守監司豫并冀四州軍事假節遣征虜將軍劉建修治馬頭城自帥眾入渦潁以援洛陽

資治通鑑升平三年詔謝萬軍下蔡帥眾入渦潁以援洛陽

懷遠縣志

卷十二

記大事

五

簡文帝咸安元年符堅遣其將救袁瑾屯洛澗桓温敗之

晉書符堅載記袁瑾固守壽春爲大司馬桓温所圍堅遣王鑒張蚝率步騎二萬救之鑑據洛澗蚝屯八公山桓温諸將夜襲鑒蚝敗之

又桓温傳堅遣其將王鑑張蚝等率兵救瑾屯洛澗先遣精騎五千次于肥水北温遣桓伊及弟子石虔等逆擊大破之

孝武帝太元八年符堅率眾渡淮遣其將梁成等屯洛澗謝元遣劉牢之擊破之

晉書符堅載記梁成與其揚州刺史王顯弋陽太守王詠等帥眾五萬屯於洛澗柵淮以遏東軍成頻敗王師晉遣都督謝石徐州刺史謝元豫州刺史桓伊輔國將軍謝琰等水陸七萬相

繼拒融去洛澗二十五里憚成不敢進龍驤將軍劉牢之率勁卒五千夜犯梁成壘克之斬成及王顯王詠等十將士卒死者萬五千謝元以旣敗梁成水陸繼進

又謝元傳梁成王先等屯洛澗元遣廣陵相劉牢之五千人直指洛澗卽斬梁成及成弟雲步騎奔潰爭赴淮水牢之縱兵追之生擒堅僞將梁他王顯梁悌慕容屈氏等收其軍實

又劉牢之傳符堅梁成以二萬人屯洛澗謝元遣劉牢之以精卒五千拒之去賊十里成阻澗列陣牢之率叅軍劉襲諸葛求等直進渡水臨陣斬成及其弟雲又分兵斷其歸津賊步騎奔潰爭赴淮水殺獲萬餘人

資治通鑑太元八年冬十月秦衛將軍梁成等帥眾五萬屯於

洛澗柵淮以遏東兵謝石謝元等去洛澗二十五里而軍憚成不敢進十一月謝元遣廣陵相劉牢之帥精兵五千趨洛澗未至十里成阻澗爲陣以待之牢之直前渡水擊成大破之斬成及弋陽太守王詠又分兵斷其歸津秦步騎奔潰爭赴淮水士卒死者萬五千人於是謝石等諸軍水陸繼進

宋文帝元嘉二十七年十二月魏寇馬頭

魏書世祖紀太平真君十一年十月使征西大將軍永昌王仁自洛陽出壽春尙書長孫真趨馬頭楚王建趨鍾離高涼王那自青州趨下邳

資治通鑑元嘉二十七年十月魏主命諸將分道並進尙書長孫真趨馬頭十二月魏永昌王仁進逼壽春焚掠馬頭鍾離

齊明帝泰始二年劉懷珍敗王仲虬于莫邪山黃回擊斬馬頭太守王廣元

齊書劉懷珍傳泰始初除甯朔將軍討壽陽軍至晉熙僞太守閻湛拒守劉子勛遣將王仲虬步卒萬人救之懷珍遣馬步三千人襲擊仲虬大破之于莫邪山遂進圍壽陽

資治通鑑泰始二年三月中書舍人戴明寶啟上遣軍主竟陵黃回募兵擊斬尋陽所署馬頭太守王廣元

建武元年十一月魏寇馬頭二年二月魏主自壽陽循淮至鍾離魏書高祖紀太和十八年十二月辛丑朔遣徐州刺史元衍出鍾離戊辰車駕至懸瓠己巳詔壽陽鍾離馬頭之師所獲男女之口皆放還南十九年春正月丙子龍陽縣開國侯王郎自渦

懷遠縣志

卷十二

記大事

七

陽來降己亥車駕濟淮二月戊申車駕巡淮而東民皆安堵租運屬路丙辰至鍾離

資治通鑑建武元年十一月辛丑朔魏遣徐州刺史拓跋衍向鍾離十二月魏主至懸瓠己巳詔壽陽鍾離馬頭所掠男女皆放南還二年正月己亥魏主濟淮二月至壽陽戊申魏主循淮而東民皆安堵租運屬路丙辰至鍾離

胡氏曰自壽陽至鍾離三百三十里按三百三

字誤或是二字之訛

齊書李安民傳尋爲領軍將軍虜寇壽春至馬頭詔安民出征加鼓吹一部虜退安民沿淮進壽春

永泰元年三月裴叔業圍渦陽以救義陽大破魏師于龍亢尋敗退保渦口

齊書裴叔業傳永泰元年叔業領東海太守孫令終新昌太守  
劉思效馬頭太守李僧護等五萬人圍渦陽虜南兖州所鎮去  
彭城百二十里僞兖州刺史孟表固守拒戰叔業攻圍之積所  
斬級高五丈以示城內又遣軍主蕭瓚成寶直分攻龍亢戍卽  
虜馬頭郡也虜閉城自守僞徐州刺史廣陵王率二萬人騎五  
千匹至龍亢瓚等拒戰不敵叔業三萬餘人助之數道攻虜虜  
新至營未立于是大敗廣陵王與數十騎走官軍追獲其節虜  
又遣僞將高忽繼至叔業率軍迎擊破之斬首萬級獲生口三  
千人器仗驢馬絹布千萬計虜主聞廣陵王敗遣僞都督王肅  
大將軍楊大眼步騎十餘萬救渦陽叔業見兵盛夜委軍遁走  
明日官軍奔潰虜追之傷殺不可勝數日暮乃止叔業退保渦

口

魏書高祖紀太和二十二年裴叔業寇渦陽乙未詔將軍鄭思  
明嚴虛敬宇文福等繼援

奚康生傳裴叔業率眾圍渦陽欲解義陽之急詔遣高聰等四  
軍往授之復遣都督廣陵侯元衍並皆敗退刺史孟表頻啓高  
祖勅肅遣康生馳往赴援一戰大破之

王肅傳高祖之伐淮北令肅討義陽未尅而蕭鸞遣將裴叔業  
寇渦陽劉藻等救之爲叔業所敗肅表求更遣軍援渦陽詔曰  
得表覽之憮然觀卿意非專在水當是藻等銳兵新敗於前事  
往勢難故也朕若分兵遣之非多會無所制多遣則禁旅難闕  
今日之計惟當作必尅之舉不可爲狐疑之師徒失南兖也卿

便息意停彼以圖義陽之寇宜止則止還取義陽宜下則下鎮軍淮北深量二途勿致重爽若孟表糧盡軍不及至致失渦陽卿之過也肅乃解宜陽之圍以赴渦陽叔業乃引師而退資治通鑑明帝永康元年三月魏鎮南將軍王肅攻義陽裴叔業將兵五萬圍渦陽以救義陽魏南兗州刺史濟北孟表守渦陽糧盡食草木皮葉叔業積所殺魏人高五丈以示城內別遣軍主蕭瓚等攻龍亢魏廣陵王羽救之叔業引兵擊羽大破之追獲其節魏主使安遠將軍傅永征虜將軍劉藻及輔國將軍高聰救渦陽並聽王肅節度叔業進擊大破之肅乃解義陽之圍與統軍楊大眼奚康生等步騎十餘萬救渦陽叔業見魏兵盛夜引軍退明日士卒奔潰殺傷不可勝數叔業還保渦口

梁武帝天監四年二月遣衛尉卿楊公則屯洛口

梁書武帝紀天監四年二月壬午遣衛尉卿楊公則率宿衛兵塞洛口

楊公則傳朝廷始議北伐以公則威名素著詔假節先屯洛口公則受命邁疾強起登舟至洛口壽春士女歸降者數千戶魏豫州刺史薛度恭遣長史石榮前鋒接戰卽斬石榮逐北至壽春去城數十里乃反

魏書任城王傳澄弟嵩轉安南將軍揚州刺史蕭衍湘州刺史楊公則率衆二萬屯軍洛口姜慶真領卒五千據于芍陂又遣其左軍將軍騫小眼軍主何天祚張俊興等率衆七千攻圍陸城嵩乃遣統軍封邁王會等步騎八千討之邁達陸城賊皆夜

遁追擊破之斬獲數千公則慶真退還馬頭徐州刺史昌義之屯據高皇遣三軍潛寇陰陵以淮水淺竭不通船艦屯于馬頭資治通鑑天監四年二月上謀伐魏壬午遣衛尉卿楊公則將宿衛兵塞洛口八月楊公則至洛口與魏豫州刺史石榮戰斬之甲寅將軍姜慶真與魏戰于羊石不利公則退屯馬頭九月己巳楊公則等與魏揚州刺史元嵩戰公則敗績

梁武帝天監五年四月拔魏梁城魏中山王元英敗臨川王宏於洛口復梁城乘勝攻拔馬頭

梁書武帝紀天監五年三月丁亥陳伯之自壽陽率眾歸降五月乙亥臨川王宏前軍克梁城十一月魏寇鍾離

臨川王宏傳高祖詔北伐以宏爲都督八州諸軍事軍次洛口

前軍克梁城斬魏將暈清會征役久有詔班師

昌義之傳天監二年遷假節督北徐州諸軍事輔國將軍北徐州刺史鎮鍾離四年揚州刺史臨川王督眾軍軍洛口義之以州兵受節度爲前軍攻魏梁城戍克之五年高祖以征役久有詔班師眾軍各退散魏中山王元英乘勢追躡攻沒馬頭城內糧儲魏悉移之歸北

魏書世宗記正始三年二月乙丑平南將軍陳伯之破蕭衍徐州刺史昌義之于梁城三月庚寅平南將軍曲江縣開國公陳伯之自梁城南奔五月乙亥蕭衍將軍宏陷梁城九月己丑中山王英大破蕭衍軍於淮南衍中軍大將軍臨川王蕭宏尙書右僕射柳惔徐州刺史昌義之等棄梁城沿淮東走追奔次於

馬頭衍冠軍將軍戍主朱思遠棄城宵遁擒送衍將四十餘人  
斬獲士卒五萬英遂攻鍾離

中山王英傳蕭衍遣將軍寇肥梁詔英使持節加散騎常侍征  
南將軍都督揚徐二道諸軍事率眾十萬討之詔英曰賊勢滋  
甚圍逼肥梁出軍淹滯肥梁已陷今眾軍雲集進取之方其筭  
安在英表陳事機乃擊破陰陵斬衍將二十五人及虜首五千  
餘級又頻破賊於梁城斬其支將四十二人殺獲及溺死者將  
五萬衍中軍大將軍臨川王蕭宏尙書左僕射柳惔等大將五  
人沿淮南走凡收米三十萬石追至於馬頭衍馬頭戍主委城  
遁走遂圍鍾離

奚康生傳蕭寶卷將桓和頓軍梁城陳伯之據硤石民皆駭動

康生出擊桓和伯之等二軍並破走之拔梁城合肥洛口三戍  
按此與中山王英等傳俱不合

邢巒傳詔曰梁城之賊猶敢聚結可率二萬之眾渡淮與征南  
犄角以圖進取之計及梁城賊走中山王英乘勝攻鍾離又詔  
巒率眾會之

資治通鑑梁武帝天監五年二月乙丑徐州刺史歷陽昌義之  
與魏平南將軍陳伯之戰於梁城義之敗績三月庚寅伯之自  
壽陽梁城擁眾八千來降四月乙亥北徐州刺史昌義之拔梁  
城臨川王宏軍次洛口前軍克梁城諸將欲乘勝深入宏性懦  
怯部分乖方魏邢巒引兵渡淮與中山王英合攻梁城宏聞之  
懼諸將欲遣裴邃分兵取壽陽大眾停洛口宏固執不聽魏奚

康生馳遣楊大眼謂中山王英曰梁人自克梁城已後久不進軍其勢可見必畏我也王若進據洛水彼自奔敗己丑夜洛口暴風雨軍中驚臨川王宏與數騎逃去將士求宏不得皆散歸棄甲拋戈填滿水陸昌義之軍梁城聞洛口敗與張紹惠俱引兵退魏主詔中山王英乘勝平蕩東南逐北至馬頭攻拔之城

中糧儲魏悉遷之歸北冬十月英進圍鍾離

天監六年四月曹景宗等解鍾離之圍追魏師至洛口

梁書昌義之傳元英楊大眼攻鍾離高祖遣曹景宗韋叡帥眾二萬救焉既至與魏戰大破之義之因率輕兵追至洛口而還曹景宗傳景宗令軍主馬廣躡大眼至澨水上四十餘里伏屍相枕義之出逐英至洛口英以匹馬入梁城緣淮百餘里屍骸

懷遠縣志

卷十二

記大事

十二

枕藉生擒五萬餘人

十三年初作荆山堰

梁書武帝紀天監十三年是歲作浮山堰

康絢傳時魏降人王足陳計求堰淮水以灌壽陽足引北方童謠曰荆山爲上格浮山爲下格潼沱爲激溝併灌鉅野澤高祖以爲然使水工陳承伯材官將軍祖暉視地形咸謂淮內沙土漂輕不堅實其功不可就高祖弗納發徐揚人率二十戶取五丁以築之假絢節都督淮上諸軍事并護堰作人及戰士有眾二十萬於鍾離南起浮山北抵礪石依岸以築土合脊于中流十四年魏楊大眼鎮荆山與蕭寶寅攻淮堰不克

魏書肅宗記延昌四年四月蕭衍于浮山堰淮規爲揚徐之害

詔平南將軍楊大眼討之  
楊大眼傳時蕭衍遣將康絢於浮山遏淮規浸壽春詔加大眼  
光祿大夫率諸軍鎮荆山

梁書康絢傳十四年堰將合淮水漂疾輒復決潰衆患之或謂  
江淮多有蛟龍能乘風雨決壞巖岸其性惡鐵因是引東西二  
冶鐵器大則釜鬲小則鋸鋤數千萬斤沉于堰所猶不能合乃  
伐樹爲井幹填以巨石加土其上緣淮百里內岡陵木石無巨  
細必盡負擔者肩上皆穿夏日疾疫死者相枕蠅蟲晝夜聲相  
合高祖愍役人淹久遣尙書右僕射袁昂侍中謝舉假節慰勞  
之并加蠲復是冬又寒甚淮泗盡凍士卒死者十七八高祖復  
遣賜以衣袴十一月魏遣將楊大眼揚聲決堰絢命諸軍撤營

露次以待之遣其子悅挑戰斬魏咸陽王府司馬徐方興魏軍  
小却十二月魏遣其尙書僕射李曇定督眾軍來戰絢與徐州  
刺史劉思祖等拒之高祖又遣右衛將軍昌義之太僕卿魚宏  
文直閤曹世宗徐元和相次拒守

十五年昌義之屯梁城

梁書昌義之傳高祖遣太子右衛率康絢督衆軍作荆山堰明  
年魏遣將李曇定大眾逼荆山揚聲欲決堰詔假義之節率太  
僕卿魚宏文直閤將軍曹世宗徐元和等救絢軍未至絢等已

破魏

資治通鑑上使義之與直閤將軍王神念沂淮救硤石崔亮使  
博陵崔延伯守下蔡義之神念屯梁城不得進

四月淮堰成

梁書康絢傳十五年四月堰乃成其長九里下濶一百四十丈上廣四十五丈高二十丈深十九丈五尺夾之以堤并樹杞柳軍人安堵列居其上其水清潔俯視居人墳墓了然皆在其下或謂絢曰四瀆天所以節宣其氣不可久塞若鑿湫東注則游波寬緩堰得不壞絢然之開湫東注又縱反間于魏曰梁人所懼開湫不畏野戰魏人信之果鑿山深五丈開湫北注水日夜分流猶不減其月魏軍竟潰而歸水之所及夾淮方數百里地魏壽陽城戍稍徙頓于八公山北其居人散就岡隴魏書楊大眼傳與蕭寶夤俱征淮堰不能尅遂於堰上流鑿渠決水而還

蕭寶夤傳蕭衍遣其將康絢於浮山堰淮以灌揚徐除寶夤使持節都督東討諸軍事鎮東將軍以討之堰既成淮水濫溢寶夤於堰上流更鑿新渠引注淮澤水乃小減乃遣輕車將軍劉智文虎威將軍劉延宗率壯士千餘夜渡淮燒其竹木營聚破賊三壘殺獲數千人斬其直閤將軍王升明而還火數日不滅衍將垣康孫張僧副等水軍三千渡淮北攻統軍呂叵寶夤遣府司馬元達統軍魏續等赴擊破之康孫等奔退又遣軍士周恭叔率壯士數百夜渡淮南焚賊徐州刺史張豹子等十一營賊眾驚擾自相殺害者甚眾寶夤還京師

九月淮堰壞

梁書康絢傳初堰起於徐州界刺史張豹子宣言於境謂已必

尸其事既而絢以他官來監作豹子甚慚俄而敕豹子受絢節度每事輒先咨焉由是遂讚絢與魏通高祖雖不納猶以事畢徵絢絢既還豹子不修堰至其秋八月淮水暴長堰悉壞決奔流於海 姚察曰先是鎮星守天江而堰興及退舍而堰決非徒人事有天道矣

資治通鑑九月丁丑淮水暴漲堰壞其聲如雷聞三百里緣淮城戍村落十餘萬口皆漂入海初魏人患淮堰以任城王澄爲大將軍大都督南討諸軍事勒眾十萬將出徐州來攻堰尙書右僕射李平以爲不假兵力終當自壞及聞堰破靈太后大喜賞平甚厚澄遂不行

按梁書武帝紀及魏書皆云浮山堰獨昌義之傳作荆山堰康

絢傳言南起浮山北抵礪石水經注淮水自鍾離縣西又東經浮山山北對礪石山今荆塗二山東西對峙絕非南北亦別無浮山礪石之各謠辭所云潼沱爲激溝潼沱在今五河則此堰當在盱眙之浮山而不在荆山明矣而考當時戰爭之跡若堰在盱眙魏欲破堰當爭鍾離不當從壽陽爭荆山蕭寶寅鎮壽陽而夜遣壯士渡淮燒竹木營聚則其距壽春不遠可知又作堰以灌壽陽故堰成而壽陽方數百里皆被浸若遠在盱眙則距壽陽且三百里壽陽被浸卽鍾離以下諸城戍無不被浸矣似堰之在荆山又無可疑者然亦有不可解者梁方築堰荆山下而魏將楊大眼鎮荆山何以能安施工築而無擾又鑿山十丈開湫東注今尋荆山左右亦絕無開鑿之跡通典及寰宇記

等書多兩載之迄無定所也 夏侯亶傳普通六年裴邃伐壽陽未克而卒乃加亶使持節代邃頻戰克捷尋有密勅班師須堰成復進七年夏淮堰水盛壽陽城將沒復遣軍稍進則淮堰嘗既壞而復修而他書亦不著

普通五年九月趙景悅圍魏荆山降之

梁書武帝紀普通五年九月戊午北兗州刺史趙景悅圍荆山十月 太守曹世宗破魏曲陽城甲辰又尅秦墟魏郟潘溪守皆棄城走十二月戊寅荆山城降

魏書肅宗紀正光五年九月蕭衍遣將裴邃虞鴻襲據壽春外城刺史長孫稚擊走之邃退屯黎漿詔河間王琛總衆援之

資治通鑑普通五年九月河間王琛至西碛石解渦陽圍復荆

懷遠縣志

卷十二

記大事

十六

山戍

按通鑑此文不知所據時梁未嘗圍渦陽荆山戍至十二日始降無解圍復戍事魏書肅宗記止云援壽陽河間王

琛傳亦不載此事

青冀二州刺史王神念與戰爲琛所敗

六年二月趙景悅拔魏龍亢

梁書武帝記六年二月乙未趙景悅下魏龍亢城

大通元年攻下渦陽於渦陽立西徐州

梁書韋放傳普通八年高祖遣兼領軍曹仲宗等攻渦陽又以放爲明威將軍帥師會之魏大將軍費穆帥眾奄至放軍營未立麾下止有二百餘人放從弟洵驍果有勇力一軍所杖放令洵單騎擊刺屢折魏軍洵馬亦被傷不能進放胄又貫三流矢眾皆失色請放突去放厲聲叱之曰今日惟有死耳乃免胄下馬據胡床處分于是士皆殊死戰莫不一當百魏軍遂退放逐

北至渦陽魏又遣常山王元昭大將軍李獎乞佛寶費穆等衆五萬來援放率所督將陳度趙伯超等夾擊大破之渦陽城主王偉以城降放乃登城簡出降口四千三百人器仗充物又遣降人分報李獎費穆等魏人棄諸營壘一時奔潰衆軍乘之斬獲畧盡

陳慶之傳大通元年隸領軍曹仲宗伐渦陽魏遣征南將軍常山王元昭等率馬步十五萬來援前軍至駝澗去渦陽四十里慶之欲逆戰韋放以賊之前鋒必是輕銳與戰若捷不足爲功如其不利沮我軍勢兵法所謂以逸待勞不如弗擊慶之曰魏人遠來皆已疲倦去我既遠必不見疑及其未集須挫其氣出其不意必無不敗之理且聞虜所據地林木甚盛必不夜出諸

君若疑惑慶之請獨取之於是與麾下二百騎奔擊破其前軍魏人震恐慶之乃還與諸將連營而進據渦陽城與魏軍相持自春至冬數十百戰師老氣衰魏之援兵復欲築壘於軍後仲宗等恐腹背受敵欲退師慶之杖節軍門曰共來至此涉歷一載糜費糧仗其數極多諸君並無門心皆謀退縮豈是欲立功名直相聚爲抄暴耳吾聞置兵死地乃可求生須虜大合然後與戰審欲班師慶之別有密勅今日犯者便依明詔仲宗壯其計乃從之魏人犄角作十三城慶之銜枚夜出陷其四壘渦陽城主王緯韋放傳作偉乞降所餘九城兵甲猶盛乃陳其俘馘鼓噪而攻之遂大奔潰斬獲畧盡渦水咽流降城中男女三萬餘口詔以渦陽之地置西徐州

太清二年侯景敗于渦陽自硤石濟淮馬頭太守劉神茂納之  
資治通鑑太清元年慕容紹宗引軍擊侯景景輜重數千兩馬  
數千匹士卒四萬人退保渦陽紹宗士卒十萬旗甲耀日鳴鼓  
長驅而進夾渦而軍二年春正月乙亥慕容紹宗以鐵騎五千  
夾擊侯景景眾大潰爭赴渦水水爲之不流景與腹心數騎自  
硤石濟淮稍收散卒得步騎八百人南過小城人登陴詬之曰  
跛奴欲何爲耶景怒破城殺詬者而去晝夜兼行追軍不敢逼  
侯景既敗不知所適時鄱陽王範除南豫州刺史未至馬頭戍  
主劉神茂素爲監州韋黯所不容聞景至故往候之景問曰壽  
陽去此不遠城池險固欲往投之韋黯其納我乎神茂曰黯雖  
據城是監州耳王若馳至近郊彼必出迎因而執之可以集事

神茂帥步騎百人先爲鄉導壬子景夜至壽陽下

八月侯景反攻馬頭水柵荆山等戍

梁書武帝紀太清二年八月戊戌侯景舉兵擅攻馬頭荆山等  
戍

侯景傳景遂發兵反攻馬頭木柵執太守劉神茂戍主曹璆等  
資治通鑑景西攻馬頭遣其將東攻木柵執戍主曹璆等 考  
異曰梁書云執太守劉神茂按神茂素附於景無煩攻執今從  
太清紀典畧 胡氏註曰景自渦頭之敗南走馬頭戍主劉神  
茂迎之以入壽陽當塗之馬頭也今又自壽陽攻馬頭則此馬  
頭在壽陽之西當淮津濟渡之要縛馬頭以登舟又非當塗之  
馬頭也當塗之馬頭都在壽陽東木柵在荆山西

按胡氏以馬頭爲壽陽之馬頭戍恐未然壽陽之馬頭距城纔十餘里止是壽陽分戍並無重兵屯宿不勞景之親攻壽陽左右重鎮惟馬頭郡景規入犯恐馬頭郡倚其後故須首并馬頭木柵荆山蓋皆馬頭太守所轄景自將攻馬頭故遣將分攻諸戍馬頭郡在壽陽東北而云西攻者以荆山木柵視馬頭則馬頭在西也木柵當在洛口卽符秦柵淮以斷東軍處考異謂神茂素附於景不煩攻執亦恐未然神茂止以與韋黯不協故啟景以奪之未必遽從景以叛也所執者馬頭太守則此馬頭非壽陽之馬頭戍明矣

唐德宗建中二年李正己反遣兵扼渦口

韓愈順宗實錄李正己反將斷江淮路令兵守埭橋渦口江淮

懷遠縣志

卷十二

記大事

十九

進奉船千餘隻泊渦口不敢進德宗以張萬福爲濠州刺史萬福馳至渦口立馬岸上發進奉船淄青將士停岸睥睨不敢動諸道繼進新唐書通鑑同

懿宗咸通九年十月龐勛破徐州遣其將劉行及出渦口屯濠州資治通鑑咸通九年十月龐勛破徐州遣梁丕將千人屯宿州又遣舊將劉行及將千五百人屯濠州行及引兵至渦口道路附從者增倍

十年六月南北招討馬舉復鍾離

資治通鑑馬舉自泗州引兵攻濠州拔招義鍾離定遠

昭宗景福元年十一月濠州刺史張璠以州附朱全忠

資治通鑑時溥濠州刺史張璠以州附於朱全忠

乾甯二年三月楊行密拔濠州

資治通鑑楊行密攻濠州拔之執刺史張璠 按自此縣境爲南唐地

周顯德三年正月李穀敗南唐兵於上窰

舊五代史周世宗紀三年正月李穀奏破淮賊於上窰

宋史李穀傳穀敗吳軍千餘人於山口鎮進攻上窰又敗千餘眾獲其小校數十人

二月敗南唐兵於渦口

資治通鑑唐兵萬餘人維舟於淮營於塗山之下庚午帝命太祖皇帝擊之太祖遣百餘騎薄其營而僞遁伏兵邀之大敗唐兵於渦口斬其都監何延錫等奪戰艦五十餘艘

懷遠縣志

卷十二

記大事

二十

宋史太祖紀顯德三年春從征淮南首敗萬眾於渦口斬兵馬何延錫等

石守信傳從征淮南爲先鋒入渦口

四月作浮梁於渦口置鎮淮軍

資治通鑑四月己巳帝自壽春循淮而東乙亥至濠州丙戌渦口奏新作浮梁成丁亥帝自濠州如渦口五月丙辰朔以渦口爲鎮淮軍戊戌帝留侍衛親軍都指揮使李重進等圍壽州自渦口北歸

四年正月南唐兵自濠州沂淮救壽春

資治通鑑周兵圍壽春連年未下城中食盡齊王景達自濠州遣應援使永安節度使許文績都軍使邊鎬北面招討使朱元

將兵數萬沂淮救之

三月周主敗南唐兵於紫金山追奔至荆山洪

資治通鑑三月壬辰諸將擊唐紫金山寨大破之餘眾沿淮東走帝自趙步將騎數百循北岸追之諸將以步騎循南岸追之水軍自中流而下唐兵戰溺死及降者殆四萬人獲船艦糧仗以十萬數晡時帝馳至荆山洪距趙步二百餘里是夜宿鎮淮軍

按自趙步徑北至荆山不過百里循淮而行則中隔黑河欠河須曲折繞行故曰二百餘里也

城鎮淮軍徙下蔡浮梁於其間

新五代史周世宗紀世宗復南征徙下蔡浮梁於渦口爲鎮淮

懷遠縣志

卷十二

記大事

一一一

軍築二城以夾淮

資治通鑑甲午發近縣丁夫城鎮淮軍爲二城夾淮水徙下蔡浮梁於其間扼濠壽應援之路會淮水漲唐濠州都監彭城郭廷詔以水軍沂淮欲掩不備焚浮梁右龍武統軍趙匡贊覘知之伏兵邀擊破之戊戌以淮南節度使向訓爲武甯節度使淮南道行營都監將兵戍鎮淮己亥上自鎮淮軍復如下蔡

宋史趙贊傳

即趙匡贊

世宗再征壽春命造橋渦口通濠泗令騎帥

韓令坤董其役俾贊副之屬霖雨淮水漲溢濠人謀乘輕舟奄焚其橋贊覘知之設伏橋下濠人果至贊令强弩亂發殺獲甚眾

五月南唐兵斷渦口浮梁

資治通鑑唐郭廷謂將水軍斷渦口浮梁

宋史郭廷謂傳周師爲浮梁渦口命張從思焦繼勛守之廷謂語仁謙曰此濠壽之患也彼以騎士勝故利於陸我以舟師銳故便於水今夏久雨淮流泛濫願假舟兵二千斷其橋屠其城直抵壽春仁謙初阻其議不得已從之卽輕櫂啣枚抵其橋麾兵斷其笮悉焚之周師大虜死者不可計焚其資糧而還

十一月周主復至鎮淮軍

資治通鑑十月壬申帝發大梁十一月丙戌至鎮淮軍是夜五鼓濟淮丁亥至濠州城西

宋高宗紹興五年七月韓世忠復鎮淮軍

宋史高宗紹興五年七月韓世忠復鎮淮軍擒僞齊守王拱

懷遠縣志

卷十二

記大事

一一一

六年九月僞齊劉貌引兵出渦口入寇

宋史劉豫傳分三道入寇麟總中路兵由壽春犯廬州貌率東路兵取紫金山出渦口犯定遠西兵趨光州犯六安孔彥舟統之

高宗紀紹興六年九月劉豫起兵三十萬命子麟趣合肥姪貌出渦口引兵分道入寇

按紫金山當卽荆山顧祖禹讀史方輿紀要以爲壽春之紫金山非也旣至壽春卽不必轉出渦口矣

十年六月金人來侵劉錡由渦口趣順昌

宋史劉錡傳錡自臨安沂江絕淮凡二千二百里至渦口方食暴風拔坐帳錡曰此賊兆也主暴兵卽下令兼程而進金人果

敗盟來侵

十一年九月金人由渦口渡淮北歸

宋史韓世忠傳世忠受詔救濠與金人戰於淮岸夜遣劉寶沂流將劫之金人伐木塞赤龍洲扼其歸路世忠知之全師而歸金人自渦口渡淮北去自是不敢入侵

二十一年八月詔嚴備渦口

宋史高宗紀八月乙酉詔劉錡黃權李顯忠戚方嚴備清河潁河渦河口

十月金主亮入寇自渦口渡淮

宋史高宗紀九月金主亮以尙書右丞李通爲大都督造浮梁於淮水之上遂自將來攻兵號百萬十月辛丑金人自渦口渡

懷遠縣志

卷十二

記大事

一三三

淮 按金史海陵紀作十月丁未大軍渡淮

虞允文傳九月金主命李通爲大都督造浮梁於淮水上金主自將兵號百萬羶帳相望鉦鼓之聲不絕十月自渦口渡淮

孝宗隆興二年金自臨渙出渦口取濠州

宋史孝宗紀隆興二年十月金人分道渡淮十一月濠州亦陷金史紇石烈志甯傳僕散忠義移軍泰和志甯移軍臨渙遂渡淮徒單克甯取濠廬和滁等州 按自臨渙渡淮亦當出渦口也

甯宗開禧二年十月金分道侵宋出渦口

金史章宗紀泰和六年十月戊申朔平章政事僕散揆督諸道兵伐宋庚戌揆以行省兵三萬出潁壽江南路統軍使紇石烈

子仁以兵三萬出渦口

宋史畢再遇傳金人復自黃狗灘渡淮渦口戍將望風遁濠滁相繼失守

金史紇石烈鶴壽傳泰和六年從大軍出壽春敗宋人於渦口奪馬千餘匹

嘉定十二年二月金敗宋兵於塗山

金史宣宗紀興定三年二月辛卯行省安貞破宋兵於塗山按安貞僕散安貞也安貞傳興定二年十月爲左副元帥權叅知政事行尚書省及唐息壽泗行元帥府分道各將兵三萬安貞總之至安豐宋兵七千拒戰擊敗之塗山之捷當在此時而安貞本傳及宋史皆不載

懷遠縣志

卷十二

記大事

一四

三月李全敗金人於曹家莊

宋史甯宗紀嘉定十二年春金人圍安豐軍滁濠光三州京東總管李全自楚州忠義總轄季先自漣水軍各引兵來援金人乃解去全追擊敗之於曹家莊獲其貴帥

李全傳時金人圍淮西悉三月乙酉全至渦口值金將乞石烈牙吾答名盧鼓槌者將濟全與其將鹿仙掩之金兵溺淮者數千俘獲甚眾壬辰與阿海戰於化陂湖大捷殺金數將得其金牌追至曹家莊而還三圍俱解全喪失亦衆阿海者金所謂四駙馬也

金史紇石烈牙吾塔傳興定三年正月敗宋人於濠州之香山村二月又敗之於滁州三月大敗宋人於上津縣兵還至濠州

宋人以兵八千拒戰牙吾塔迎擊敗之獲馬百餘匹 按此卽李全渦口之戰不言敗金諱敗也牙吾塔傳云屢敗宋兵威振淮泗好用鼓槌擊人世呼曰盧鼓槌阿海卽僕散安貞明薛應旂宋元通鑑甯宗嘉定十二年李全進至渦口與金左都監紇石烈牙吾答駙馬阿海連戰於化湖陂殺金將數人得其金牌金人乃解諸州之圍而去全追擊復敗之於曹家庄而還自是金人不敢窺淮東初賈涉募能殺金太子者賞節度史殺親王者賞承宣使殺駙馬者賞觀察使李全因致所得金牌給涉云殺駙馬阿海所獲者涉請於朝乞如約授賞遂授全廣州觀察使而阿海實不死也

十四年四月金兵逼濠州由渦口還

懷遠縣志

卷十二

記大事

一五

金史宣宗紀興定五年二月丙子紇石烈牙吾塔破宋兵復泗州進逼濠州至渦口乏糧而還

又紇石烈牙吾塔傳三月復出兵宋境進逼濠州會偵者言前路芻糧甚艱乃西掠定遠由渦口而還

理宗端平三年元人攻荆山

元史怯怯里傳太宗七年當端平三年南伐以千戶從濶端攻安豐

壽州又從諸王塔察兒率蒙古軍二千攻荆山破之

按元史太宗紀及宋史理宗紀俱不載攻安豐壽州荆山事宋元通鑑端平三年十一月蒙古口温不花入淮西游騎自信陽趨合肥則攻荆山當在十一月也

淳祐六年七月與元人戰於龍岡

宋史理宗紀七月乙巳呂文德言北兵圍壽春舟師至黃家穴  
總管呂文信夏貴戰龍岡有功詔文信轉一官餘依等第轉補  
八年二月敗元人於渦口

宋史鄭清之傳八年詔趙葵以樞使視師陳韓以知樞密院事  
帥湖廣於是戰於泗水渦口木庫皆以捷聞

理宗紀八年二月辛丑趙葵表陳奕譚涓玉王成等戰渦河龜  
山有勞

十年元築堡於龍岡

元史李進傳從張柔屯杞之三义口時荆山之西九十里曰龍  
岡者宋境也歲庚戌奉柔命引兵築堡岡上會淮水泛漲宋以  
舟師卒至主帥察罕帥兵逆戰進以兵十五人載一舟轉鬪十

懷遠縣志

卷十二

記大事

一六

餘里奪一巨艦

按元史王珍傳宋城五河口珍帥死士二千人奪之宋人遁乘  
勝進師連破濠泗渦口其事在中統前而宋史不著城五河事  
其年不可考姑附錄於此 五河縣志載端平二年金亡遺民  
來歸置隘使屯田於五河口城五河或當是時然此語亦不詳  
其所本

寶祐五年五月置懷遠軍以夏貴知懷遠軍

宋史理宗紀寶祐五年五月丁卯城荆山置懷遠軍荆山縣壬  
午夏貴正任吉州刺史帶御器械鎮江駐劄都統制知懷遠軍  
景定三年夏貴襲徐宿元張宏畧遏之於渦口

元史張宏畧傳中統三年李壇反求救於宋將夏貴貴自蘄乘

虛北奪毫滕徐宿邳滄濱七州殺守將宏畧率戰船遏之於渦  
口貴退保蘄

按此渦口當是渦河上游之口夏貴轉戰至徐邳則入淮之渦  
口非其歸路且宋已城荆山而置戍宏畧未必能以兵遏之也  
度宗咸淳二年四月元敗宋兵於荆山

元史世祖紀至元三年四月亳州水軍千戶胡延等領騎兵渡  
淝水逾荆山與宋兵戰殺獲甚眾賞鈔幣有差

七年九月元敗宋兵於渦河

元史世祖紀至元八年敗宋軍於渦河  
帝顯德祐元年七月以楮一正知懷遠軍

宋史瀛國公紀七月庚申加知高郵軍楮一正閤門宣贊舍人

懷遠縣志

卷十二

記大事

二七

知懷遠軍賞守邊功

二年二月懷遠軍降於元

元史世祖紀至元十三年二月淮西制置使夏貴以淮西諸郡  
來降

張子良傳子良子懋伯顏令行徇鎮巢安豐壽春懷遠淮安濠  
等州軍皆下

元世祖至元十三年九月命毀沿淮城壘

元史世祖紀至元十三年九月命有司隳沿淮城壘

二十八年正月降懷遠軍爲縣

元史世祖紀至元二十八年正月升安豐府爲路降壽春府懷  
遠軍爲縣懷遠入濠州並隸安豐路

順帝至正十三年明花雲破懷遠

明史花雲傳至正十三年癸巳仗劍謁太祖於臨濠奇其才俾將兵畧地所至輒克破懷遠禽其帥

二十六年明師平懷遠

明史太祖紀是時張士誠所據南至紹興北有通泰高郵淮安濠泗二十六年夏四月乙卯襲破士誠將徐義水軍於淮安濠徐宿三州相繼下淮東平

明恭閔帝建文四年平安敗燕師於淝河

明史恭閔帝紀建文四年燕兵攻宿州平安追及於淝河斬其將王真遇伏敗績

成祖紀三月壬辰平安以四萬騎躡王軍王設伏淝河大敗之

懷遠縣志

卷十二

記大事

一一八

平安傳四年燕軍復南下破蕭縣安引軍躡其後至淝河燕將白義王真迎敵安轉戰斬真真驍將燕王嘗曰諸將奮勇如我真何事不成至是爲安所殺燕王乃身自迎戰安部將火耳灰挺槊大呼直前刺王馬忽蹶被禽安稍引却

讀史方輿紀要建文四年燕兵至河平安自後躡之燕王曰此地濱河多林木敵疑有伏必不敢輕進淝河旁地平少樹彼必不疑可設伏覆之也乃率騎至淝河設伏安至敗走

按是時燕兵攻宿州戰地或在宿境而方輿紀要載之懷遠故著之

世宗嘉靖三十九年邑民孫學作亂

舊縣志嘉靖三十九年庚申縣南賈村人孫學聚黨爲亂知縣

羅汝賢主簿楊元之率鄉兵圍其家賊自殺黨亦散亡  
莊烈帝崇禎九年正月流賊陷懷遠

嘯虹筆記羣盜表崇禎九年丙子正月闖王闖塌天八大王搖  
天動七賊率眾數十萬攻滁州盧象昇祖寬大敗之走鳳陽焚  
懷遠 棗彊賊紫微星陷懷遠靈璧逼泗州

綏寇紀畧懷遠龍岡集之戰遊擊朱子鳳領廟灣兵五百與賊  
數萬戰死之 按此不載何年當卽是年也

舊縣志崇禎九年二月流賊李自成率眾破縣八月初四日賊  
又破縣十六日賊又破縣搶掠焚燬盡成邱墟  
十四年二月流賊焚龍亢

崇禎十四年辛巳正月二十五日流賊袁老山至雙澗集而還

懷遠縣志

卷十二

記大事

一九

二十九日袁時中同其叅謀薛文强率兵至龍亢一卒無心遺  
火薛親督兵救撲次日貫卒耳游營二月初六日時中兵去初  
八日一條龍兵至焚殺並行龍亢煨燼矣 此見龍亢王氏家  
傳

生員楊蘭甲校字